

**Kalaallit Nunatsinni ataavartumik efterskoliliornissaq anguniarlugu Naalakkersuisut
pilerausiorissaannik peqquneqarnissaannik Inatsisartut aalajangiiffigisassaattut
siunnersuut**

pillugu

**Kultureqarnermut, Ilanniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSISSLUTAA

Aalajangiiffigisassatut siunnersuutip aappassaaneerneqarnerani saqqummiunneqartoq

Siunnersummik suliariinninnermini Kultureqarnermut, Ilanniartitaanermut,
Ilisimatusarnermut Ilageeqarnermullu Ataatsimiititaliaq ukuninnga inuttaqarpoq:

Harald Bianco, Inuit Ataqatigiit

Debora Kleist, Inuit Ataqatigiit

Andreas Uldum, Demokraatit

Malik Berthelsen, Siumut

Knud Kristiansen, Atassut

Jakob Skabe, Kattusseqatigiit Partiiat (sinniisussaq)

1. Aallarniut

Siullermeerinerup kingorna siunnersuut Kultureqarnermut, Ilanniartitaanermut,
Ilisimatusarnermut Ilageeqarnermullu Ataatsimiititaliamit misissorneqarpoq matumalu
kinguliani Inatsisartut aalajangiinissaminni tunngavissaannut tapeeqataassutini
saqqummiullugit.

1.1 Siunnersuutip imarisaa

Kalaallit Nunaanni efterskolernissamik ukiuni kingullerni qinnuteqaatit Qasigiannguani efterskolimi inissanit amerlanerusartut siunnersuuteqartup maluginiarsimavaa.

Taamaattumillu efterskolimik ataavartumik allamik pilersitsinissamut pilersaarummik saqqummiusseqquullugit Naalakkersuisut peqquneqarnissaat siunnersuuteqartup kissaatigaa.

2. Ataatsimiitaliamit aallarniutitut tunngavissaatinneqartut

Siunnersuutip oqaasertaa naapertorlugu efterskolimik allamik pilersitsinissamut pilersaarummik suliaqarnissamut taamaallaat Naalakkersuisut peqquneqartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiitaliap aallarniutigalugu oqaatigissavaa. Tamatuma kingunerissavaa taamatut efterskolimik pilersitsinissamut periarfissanik piumasaqaatinillu Naalakkersuisut misissuissasut. Taamaalillunilu efterskoli pilersinneqassanersoq siunnersuutip akuersissutigineqarneratigut aalajangiiffigineqassanngilaq, aalajangiinissamummi tunngavimmik naleqquttumik pissarsinissamut Naalakkersuisut siunnersuutikkut taamaallaat peqquneqarmata. Taamaattumik pissutsit allallu arlallit misissuinerni ilaatinneqartariaqartut suussusersinissaat matuminnga isumaliutissiissuteqarnermi pingaarnertut siunertarineqarput.

3. Ilinniartunik tunngavissaqarnissaq pillugu isumaliutit

Danmarkimi taamaallaat efterskolertoqarsinnaagallarneranut sanilliullugu Qasigiannguani efterskolimik pilersitsineq ilinniartutigut tunngavissamik nutaamik pilersitsisoq arlaleriarluni oqaatigineqarpoq. Naalakkersuisut ilaatigut eqqoriarpaat atuartunut kalaallisuinnaq kalaallisuinngajalluunniit oqaasilinnut oqaatsillu pissutigalugit Danmarkimut efterskoleriarsinnaanngitsunut Kalaallit Nunaanni efterskolernissaq pilerinarsinnaasoq. Naalakkersuisut eqqoriaanerat ilumoorsimappat ataatsimiitaliamit nuannaarutigineqarpoq. Ataatsimiitaliamilli aamma erseqqissarneqassaaq tapiissuteqariaatsit maanna atuuttut pissutigalugit assersuutigalugu Danmarkimi efterskolernermit Kalaallit Nunaanni efterskolerneq angajoqqaanut akikinnerujussummat, tamannalu ataatsimiitaliap Naalakkersuisunut siusinnerusukkut eqqumaffigeqqusimavaa. Taamaalilluni efterskolimik toqqaanermi aningaasaqarnermut tunngasut pissutaaqataasinnaanerat mattunneqarsinnaanngilaq. Inuuasuttut (taakkulu angajoqqaavisa) Danmarkimi pinnani Kalaallit Nunaanni efterskolernissamik aalajangererat toqqaanerua imaluunniit tunulliussisariaqarnerua aammalu inissanik pisariaqartitsineq tamatumalu kingunerisaanik nunatta karsianut aningaasartuutit tapiisarnermik maleruagassat naleqqussarnerisigut

annikillisinneqarsinnaappat? Apeqqutit tamakku Naalakkersuisut piffissami aggersumi misissuinissaanni erseqqinnerusumik qulaajaavagineqartariaqarput.

Efterskolimut qinnuteqartut sukkulluunniit akuerineqarsinnaanngorlugit efterskolimi inissat naammattut ungasinnerusoq isigalugu pigineqalernissaat naapertuunnersoq siunnersuutip siullermeerneqarnerani isumaliutigineqarpoq. Taamatut anguniagaqarneq ataatsimiititaliamit maannangaaq nangaanartoqartinnejqarpoq. Ilinniartitaanermut qanoq ittuugaluamut qinnuteqartoq kinaluunniit sukkulluunniit imaaliaallaannarluni akuerineqarsinnaappat tunngaviusumik isigalugu tamanna ataatsimiititaliamit soorunami nuannaarutigineqassaaq. Taamaattorli ataatsimiititaliatut akisussaassuseqartutut oqaatigineqartariaqarpoq qinnuteqartut tamarmik ilinniarfissamik kissaataat sukkulluunniit malinneqarsinnaasunngorlugit ilinniarfitt inissaqassusiat annertusarneqassappat, tamanna inuiaqatigiit ataatsimut isigalugit naapertuuttuunani lu aningaasaqarnikkut nammanneqarsinnaanngilaq. Tamatuma pinngitsoorani kingunerissavaa pisariaqartitsinermit annertunerusumik qaqtiguinnarlu tamakkiisumik atorneqarsinnaasunik inissaateqalerneq. Inuiaqatigiit ungasinnerusoq isigalugu sulisussatut pisariaqartitaannut naapertuuttumik ilinniarfinnik neqerooruteqarsinnaaneq inuiaqatigiittut soqutigisarisariaqarparput. Tamatuma saniatigut assersuutigalugu piginnaasakinneq inerisimanninnerluunniit pissutigalugit ilinniarfissanik naleqqutinngitsunik qinnuteqartut mattunneqarsinnaanerat inuit ataasiakkaat tungaannit (inuiaqatigiillu aningaasaqarnerannit) isigalugu naapertuuttuusinnaasoq ataatsimiititaliaq isumaqarpoq. Inuit ataasiakkaat ersarilluinnartumik naleqqutinnginnertik pissutigalugu ilinniarnerminnik taamaatitsisariaqalernerat itigartinneqaannarnermit ajorsarnertut annerusumik misigissagaat naatsorsuutigineqarsinnaammat.

Tamatuma saniatigut ilinniartitaanerit neqeroorutigineqartut, tassunga ilanngullugu efterskolimi inissat, nunap immikkoortuini ineriartornikkut naatsorsuutigisanut naleqqussarneqartariaqarput. Ukiuni qulikkaani aggersuni innuttaasut agguaqatigiissillugu ukioqqortusiartuinnassasut nalunngilarput; allatut oqaatigalugu inuusuttut ilinniagaqalernissamut ukiumikkut angummattut ikinnerulissapput.

Qasigiannguani efterskolimi inissaatigineqartunit qinnuteqartut manna tikillugu amerlanerusimanerat assortorneqarsinnaanngilaq, taamaattumillu Kangerlussuarmi, Sisimiuti Qaqortumilu utaqqiisaasumik efterskoliliornissaq pisariaqarsimalluni. Efterskoliugallartulli

ilaat marluk maanna atorunnaarsinnejareerput kingullerlu (Kangerlussuarmiittooq) atorunnaarsinnejalerluni. Efterskoliugallartunik taakkuningga matusineq atuartut qinnuteqartartut ikilinerinnaannik pissuteqanngitsoq ataatsimiititaliap soorunami ilisimavaa. Kalaallit Nunaannili efterskolinut qinnuteqartut amerlanerujussuat piffissami killiliinnarmi atuunnersoq aamma isumaliutigineqartariaqarpoq. Qasigiannguani efterskoli ukiualunnguit qaangiuppata nutaarsiassaajunnaarpal tassunga qinnuteqartartut nalinginnaanerusumik amerlassuseqalernissaat ilimanarsinnaavoq. Taamaalilluta allanut atatillugu ilisimavarput inuusuttut ilinniarnissamik inuussutissarsiummillu toqqaasarnerat suut massakkorpiaq nutaarsiassaanerannik aallaaveqarlunilu nikerartartoq, tamannalu isumaliutissiisummi kingusinnerusukkut ataatsimiititaliap uterfigissavaa. Kiisalu inuusuttut ukioqatigiaat marluk 2008-mi meeqqat atuarfiat ataatsikkut qimammasuk ataatsimiititaliamit eqqaasitsissutigineqassaaq. Inuusuttut ukioqatigiaat marluk tigunissaannut ilinniarfitt naammaginartumik ajoraluwartumik piareersimasimanngillat, tamannalu ilaatigut sumiiffinni arlalinni, ilaatigut Aasianni ilinniarnertuunngorniarfimmi inissatigut ajornartorsiorfiusimalluni. Tamatuma saniatigut pingaartumik inuusuttut ukioqatigiaat atuarfitsialammik ilaannakortumik malinnissimasut, taamaakkaluartorli ukiumik atuarfiusumik kingullermik piaaffigineqarsimasut, ilinniagaqalernissamut piareersaataasumik ilinniartitaanernik aallartitsinissamut ilisimasatigut naammattumik piginnaaneqanngitsutut misigisimasartut ilaatigut Aningaasaqarnermut Ataatsimiititaliamit siusinnerusukkut paasineqarpoq. Inuusuttut ukioqatigiaat taakku amerlanersaat Kalaallit Nunaanni Danmarkimilu efterskolinut qinnuteqarnermikkut tamanna iliuuseqarfigaat. Atuartut taakku ilaat ikinngitsut efterskolertuunissaat naatsorsuutigineqartariaqarpoq. Apeqquterpassuit tamakku efterskoleqarnermi ungasinnerusoq isigalugu pisariaqartitanik misissuinernut ilanngunneqarnissaat pissusissamisuussaaq.

Siunnersuut siullermeernejarmat isumaliutigineqarpoq efterskolinik allamik pilersitsisoqassappat taanna atuartunik nunanit allaneersunit aamma atuartuuteqarnissaa pitsaaquteqassanersoq. Eqqarsaat taanna ataatsimiititaliamit pissanganartutut isigineqarpoq. Taamaattoqassappat tamanna efterskolip ilinniagassatigut aaqqissugaaneranut oqaatsinillu atuartitsissutigineqartunut naleqqussarneqassaaq, tamannalu efterskolip ilinniagassatigut aaqqissugaanera pillugu isumaliutini ataatsimiititaliap uterfigissavaa.

4. Efterskoliulerumaarsinnaasup inissisimaffigisinnaasaa pillugu isumaliutit

Efterskoliulerumaarsinnaasup inissisimaffigisinnaasaa pillugu siunnersuut siunnersuutip siullermeerneqarnerani assut soqtigineqarpoq. Efterskolip Tasiilami inissinneqarsinnaanera immikkut pitsaaquteqarsinnaasoq arlalinnit oqaatigineqarpoq. Taama inissiinikut Kalaallit Nunaata Kangiata Kitaatalu akulerutsinnissaat siuarsarneqarsinnaavoq. Apeqqulli ataatsimiitaliap maanna inaarutaasumik isummerfigerusunngilaa, tassa sumiluunniit inissiiffiusinnaasumik naleqquttumik misissuinissamut Naalakkersuisut ataatsimiitaliamit mattukkumaneqanngimmata. Tamatuma saniatigut efterskoliulerumaarsinnaasup inissinneqarfissaa pillugu apeqqut najukkani politikerinit iluaqutiginiarneqassanngimmatt ataatsimiitaliamit erseqqissaatigineqassaaq. Tamanna aalajangiisutinnejassappat efterskolip tassanilu atuartut pilliutigineqassapput, tamannalu akuerineqarsinnaassanngilaq.

Tamatuma saniatigut efterskolip inissiffissaanik aalajangerniarnermi pissutsit arlallit ilanngunneqartariaqarput.

Efterskolip eqqaa sammisassanik neqerooruteqarnissamut periarfissagissaarpat pitsaasuussaaq, soorlu ilaqtutanut attaveqarnissamut, ilaqtariinnik attaveqarfissanik pissarsinissamut, sunngiffinni sammisassanut, kulturikkut aaqqissuussanut peqatigiiffinnilu sulinissamut.

Ilinniartitsisunik piginnaasaqarluartunik sulisussarsisinnaaneq ilanngullugu efterskolip inissiffissaai isumaliutigineqartariaqarpoq, taamaalilluni najukkami annertuumik ilinniartitsisussaaleqiffioreersumi ilinniartitsisussat pilligit najukkami atuarfimmik efterskoli unammilleqqunagu. Aammattaaq ilinniartitsisujumaartut aappallit aappaasa najukkami suliffittaarsinnaanissamut periarfissaqarnersut nalilorsorneqartariaqarpoq.

Sanaartornermut aningaasartuutit killilersimaarnissaat piffissallu suliniummut atorneqartup sivikillisinnissa siunertaralugit efterskoli illutani pioreersuni inissinniarneqartariaqarpoq. Assersuutigalugu akunnittarfikoq ilinniartulluunniit ineqarfikuat efterskolinngorlugu allanngortiterneqarsinnaavoq imaluunniit højskoli ilinniarfilluunniit alla suleqatigalugit efterskolimik ataavartumik pilersitsisoqarsinnaavoq.

Efterskolip inissiffissaanut najukkami angallannermut pissutsit ilanngullugit isumaliutigineqartariaqarpoq, taamaalilluni assersuutigalugu juullilernerani poorskilerneraniluunniit atuartut ilaquuttaminnut tikeraarnissaat angallannermik periarfissat killeqarnerannik tикинneqartarnerulluunniit akuttuneranik mattunneqaqqunagit. Aammattaaq ilinniartitsisunik sulisussarsiorneq atuartussarsiornerlu eqqarsaatigalugit angallannikkut pissutsit pissaanngitsut akimmissaartitsisinhaapput.

Siuiani taakkartorneqartut Naalakkersuisut misissuinissaminni ilanngutissagaat ataatsimiitaliamit naatsorsuutigineqarpoq.

5. Efterskolimik piginneriaasissaq ingerlatseriaasissarlu pillugit isumaliutit

Qasigiannguani maanna efterskoli – inatsisitigut tunngavissat naapertorlugit – ilinniarfittut imminut pigisutut pilersinneqarsimavoq. Piginneriaaseq taamaattoq efterskoliulerumaartussanut atuutsinniarneqartariaqarnersoq ataatsimiitaliamit isummerfigineqanngilaq. Efterskoli imminut pigisoq angajoqqaat peqataatinneqarnerannik akisussaaqataanissaannullu siuarsaanissamut naleqquuttuussaaq. Akerlianik immaqa aamma oqaatigineqarsinnaavoq efterskolip aningaasalersorneqarnera tamakkiisumik imaluunniit annertoorujussuarmik nunatta karsianit akilerneqarpat taama piginneriaaseq akisussaassutsip oqartussaaffiullu illikartinneqarnerannik kinguneqarsinnaavoq.

Angajoqqaat akiligassaminnik naammassinninnginnerat pissutigalugu Qasigiannguani efterskoli aallarteqqaarami aningaasaqarnikkut annertuumik ajornartorsiuteqarpoq. Efterskolimik allamik pilersitsisoqassappat aningaasatigut taama inisseratarsinnaaneq pinngitsoortinniarlugu atorluarsinnaasumik upalungaarsimasoqartariaqarpoq, tassami efterskoli pingaartumik aallarnisarnermini aningaasaqarnikkut ulorianartorsiotsinnaammat.

Taamaakkaluartoq akiliisarnermi aaqqissuussinerit atuuttut akiliinissamullu kajumissuseqartitsiniarnissaq sukumiisumik isumaliutigineqartariaqarput. Pisortat atuartumut ataatsimut aningaasartuutaat aallaavigalugit naliliinermi inuuusuttut Danmarkimi efterskolernissartik toqqarpassuk, tamanna nunatta karsianut akikinnerpaassaaq. Namminersorlutilli Oqartussat tapiissuteqartarnermut namminneq maleruagassiaat pissutigalugit Kalaallit Nunaanni efterskolernermut sanilliullugu Danmarkimi efterskolernermut angajoqqaat namminneq akiliutaat amerlasuutigut qaffasinnerusarput.

Taamaalillutik meeqqamik Danmarkimut pinnatik Kalaallit Nunaanni efterskolertinnissaannut angajoqqaat aningaasaqarneq eqqarsaatigalugu kajungerinerusarpaat, naak tamanna nunatta karsianut akisunerullunilu meeqqat atuarfianni nalinginnaasumik ilinniartitsisussaaleqinermut annertusaqataagaluartoq. Tamannali Kalaallit Nunaanni efterskoleqanngivinnissaanik inerniliinermik kinguneqassanngilaq, tassami Danmarkimi efterskolernissaq atuartut ilaannut perarfissaaneq ajormat. Inuttut aningaasaqassuseq kisiat pissutigalugu inuusuttut ilaasa Danmarkimi efterskolernissaannik uagut inuiaqatigiittut mattutissanerigut isumaliutigineqartariaqarpoq. Kalaallit Nunaanni efterskolimik allamik pilersitsineq Danmarkimi efterskolinut qinnuteqartartut ikilinerannik aammalu Kalaallit Nunaanni efterskolinut qinnuteqartartut amerlinerannik kinguneqarpat, tamanna aningaasaliissutigut sunniuteqassaaq, tamannalu aamma qulaajarneqartariaqarpoq, tak. siunnersuutip aningaasatigut kingunerisassai pillugit immikkoortoq.

Efterskolip pingaarnertut aqunneqarnerani atuartut angajoqqaavisa sapinngisamik peqataatinneqarnissaat efterskolip ingerlatseriaasissaani aallaqqaammulli siunertarineqartariaqarpoq.

Efterskolip aqutsisuisa sapinngisamik ilinniartitsisuullutillu suliamik ilinniagaqartuunissaat anguniarneqartariaqarpoq. Oqaatsit, suliatigut piginnaasat atuartullu nunanit allaneersut peqataatinneqarnissaat salliutillugit efterskolimik pilersitsinissaq anguniarneqassappat tamanna minnerunngitsumik pingaaruteqarpoq.

Kiisalu atuartut aningaasaqarnikkut atugarliortuneersut ilinniarnissamut piukkunnaatillit tiguneqarsinnaanerat annertusarniarlugu kattuffit nammineq piumassutsiminnik ingerlasut inuussutissarsiornermillu ingerlatsisut aningaasalersugaannik atuartunut inissanik pilersitsinissamut perarfissat misissorneqartariaqarput.

6. Innuttaasut akuutinneqarnissaat pillugu isumaliutit

Efterskoliuersinnaasoq pillugu siunnersuutinik saqqummiussinissamut kattuffit peqatigiiffiillu arlallit perarfissinneqartariaqarput. Tamanna maannangaaq pisariaqarpoq inaarutaasumik pilersaarut pigineqalerpat aatsaat pinnani, tassami taamaalinerani avataaneersut sunniuteqarsinnaanerat ajornakusoortartoq misilitakkat takutimmassuk. Assersuutigalugu Sorlaap, IMAK-ip, Inuuusuttut Siunnersuisoqatigiivi, inuuusuttunut

suliffeqarfait, soorlu NUIF, isumaginninnerup iluani sulisut, ilinniarfiit, sulisitsisut sulisartullu kattuffait tusarniassallugit naleqquttuussaaq.

Pisariaqassappat soqtigisallit allat Naalakkersuisunit akuutinneqarumaartut ataatsimiititaliap qularutiginngilaa.

7. Inatsisinut suliniutinullu allanut attuumassutilit pillugit isumaliutit

Efterskolimik allamik pilersitsinnginnermi suliassaqarfimmi peqqussut atuuttoq naammaginarnersoq soorunami isumaliutigineqartariaqarpoq. Taamaalilluni Naalakkersuisut peqqusummik misissuinissaat pisariaqassappallu allannguutigitinneqartariaqartunik nassuaatikkut nassuaateqarnissaat ataatsimiititaliamit naatsorsuutigineqarpoq. Tassunga ilaatigut ilanngullugu peqqussut efterskolimut tunngasuni pissutsit pillugit aningaasaliissuteqartut naammaginartumik peqqussutikkut paasissutissinneqarnersut isumaliutigineqartariaqarpoq.

Tamatuma saniatigut efterskoliulerumaartup suliniutinut allanut ataqtigiissarneqarnissaa pingaaruteqartorujussuuvoq. Suliniutinut allanut, assersuutigalugu Nuummi Aasiannilu ilinniarnertuunngorniarfiit allilerneqarnissaannut efterskoli alla sunniuteqassava?

8. Isumaliutit allat

Siunnersuutip siullermeerneqarnerani Naalakkersuisunut ilaasortap naggataarutaasumik oqaaseqaammini paasissutissiissutigaa Kangerlussuarmi efterskoliugallartoq ingerlaqqinnissaminut naleqqutinngitsoq. Tamanna Naalakkersuisut misissuinissaanni itisilerneqassasoq ataatsimiititaliamit qinnutigineqarpoq.

9. Siunnersuutip aningaasatigut kinguneri

Misissuinerup inernerri Naalakkersuisunit saqqummiunneqartariaqarput, taamaalilluni efterskolimik allamik pilersitsinermi aningaasatigut kingunerisassat aningaaasanut inatsisisstatut siunnersuutini ukiut tamaasa augustip qaammataani saqqummiunneqartartuni ilanngunneqarsinnaaqquillugit. Taamaalilluni efterskolimik allamik pilersitsinissaq pillugu aalajangerneq siunertamut aningaasanik immikkoortitsinissaq pillugu aalajangernermut immikkoortillugu peqqunagu.

Naalakkersuisut nalunaarusiariumaagaanni siunnersuutip aningaasaqarnikkut kinguneri sukumiisumik nassuiaatigineqassasut tamatumalu peqatigisaanik aningaasalersuinissamut siunnersuuteqartoqassasoq piumasarineqartariaqarpoq.

10. Inassuteqaatit

Siuliani oqaaseqaatit siunnersummillu siullermeerinermi oqaaseqaatigineqartut tunngavigalugit siunnersuut akuerineqassasoq **ataatsimiititaliap isumaqatigiittup inassutigaa.**

Taama oqaaseqarluni ataatsimiititaliap siunnersuut aappassaaniigassanngortippaa.

Harald Bianco

Debora Kleist

Andreas Uldum

Malik Berthelsen

Knud Kristiansen